

David necesse habuit salutem sibi fuga quærere, & in exilio aliquot annis magno vitæ suæ periculo incertis sedibus vagari. Itaq; cum varijs ærumnis exilijs affligeretur, & meminisset calumniarum, quibus sycophantæ animum regis Saulis, sua sponte ad suspicionem affectati regni procliue inflammabant, suscipit hanc precationem coram Deo effundendam, qua petit, vt Deus ipsum ab impijs calumniatoribus tueatur.

Potest & huius Psalmi occasio orta esse ab eo exilio, in quod David à suo ipsius filio Absolone eiectus est, & non solum coram audijs, vir sanguinum, & vir Belial, verumetiam traducebatur à calumniatoribus, apud vniuersum Israël, quod esset cessator, & ad ministrandæ iustitiæ neglector.

Constat autem hic Psalmus syllogismo, cuius propositio, quam Dialectici vocant Maiorem, recitatur in priori parte Psalmi, videlicet.

Deus non delectatur iniquitate: non commorantur apud Deum maligni: & odio habet omnes operantes iniquitatem: perdit omnes qui loquuntur mendacium: abominatur viros sanguinum & dolosos, sycophantas & calumniatores. Hæc est Maior propositio. Sequitur deinde in altera parte Psalmi Assumptio, quam vocant propositionem Minorem, videlicet.

Mei inimici sunt viri iniqui, sunt maligni, sunt mendaces, non est in ore ipsorum veritas, cor eorum vanum est, guttur eorum est sepulchrum patens, linguis suis dolose agunt, hoc est, sunt sycophantæ & calumniatores. Hæc est Assumptio seu propositio Minor, cui postremo additur complexio seu conclusio syllogismi, videlicet,

Ergo